

四庫全書

集部

欽定四庫全書

集部

抑菴文後集卷三十四

詳校官編修_臣裴謙

中書_臣劉源溥覆勘

總校官進士_臣楊懋珩

校對官學正_臣湯垣

謄錄監生_臣劉廷勳

欽定四庫全書

抑菴文後集卷三十四

明 王直 撰

傳

林叅政家傳

林叅政諱瑜字子潤漳之龍巖人自幼聰敏好學

缺

缺為邑庠生學成陞太學洪武中選授五軍斷事司稽

缺治獄號為平六年陞右斷事益以明慎得名公卿間

數月擢拜江西按察司僉事嘗行部至贛贛之大豪有

索逋而殺人者反誣其姪有司受賂鍛成之上其獄於公公察其色有寃曰是非為惡者安有殺伯母事乎為庶得其實卒坐大豪而罪有司由是所至稱神明不敢欺安福姦民數十聚為盜剽掠勢張甚郡縣不能得詔發兵捕之任事者並緣為姦利不急捕盜反以藏匿誣平民轉相牽引撈掠以取貲於是盜逸而民弊矣未幾皆以罪去而公獨任其事乃一切禁止苛暴處以閒和任鄉民之有力者蹤跡之盜悉得而民不擾既三考以

最陞江西按察副使長沙流民作亂轉掠入袁州朝廷
命豐城侯督兵討捕擇大臣為民所信慕者得公使先
往招撫脅從者順服首惡就擒民以無事公之功為多
王師之出絕漠也命下江西造戎衣一百萬期三月輸
邊弗完者以乏軍興論公實董之如期而集又從工部
尚書宋禮入巴蜀求宮殿大材公分往馬湖路極險惡
衆皆難之公曰我豈擇便避事者邪卒皆辦治亦不後
期蓋公持已以誠待人以恕故民懽趨之不勞而功立

如此公初入蜀也江西有二十人者以魘魅就獄於法
當死而無其情衆疑不能決公歸力辯出之二十人者
拜呼曰我固知公能活我今果然為副使九年當考績
去山谷耆民三百餘人出拜馬前曰公在江西二十年
惠我民也厚矣今決去可奈何因抱公足而泣公亦為
下淚至京師考最陞浙江布政司叅政時布政以下皆
缺而浙地大人衆素號繁劇公勤而撫之民多悅服既
一年吏舍失火治事之堂案牘之舍皆燬焉事聞下刑

部逮問公至輒引服曰此瑜責也夫何辭獄未上而公病以永樂二十一年朔旦卒年六十八公端厚樂易寬裕儉勤嘗舉汪信民菜根之言以教子使必明善誠身而不急於文藝其子平皆能服公之教云

泰和王直曰予始遊鄉校時公為江西僉事所至廬問風俗卹孤老振冤滯興廉律貪沮惡佑善數進諸生講聖賢之道使充其德行而發於文章其言切實正大人至今頌之不衰於平居是任者有不當如是邪然而乃有

以苛察相高以猛鷙相尚茂忠敬之實無豈弟之心者抑又何邪然則若公之賢詎可使無傳哉故論著之

吳先生傳

吳先生勤字孟勤永新人也曾祖原道祖文振皆不仕考師尹元名進士為永豐縣丞先生幼聰敏好學日誦數十言迨成童四書五經皆暗記為文必根於理而氣充才膽偉然出儕輩諸老先生皆謂一第可俯拾以永豐君老不果出元季盜起先生以策干吉安守臣尼雅斯

迪音冀弭盜不見用去避亂於洪偽漢圍洪行省平章
多通不能守或欲薦先生先生曰吾觀此人無固志安
能用吾言亟止之明旦多通果遁城遂陷先生間道歸
永新國朝兵取吉安總帥蒐用賢才俾綏輯諸邑淮南
郭子章在幕府得先生懽甚俾之官泰和不就洪武初
詔天下皆立學徵名儒為之師先生得武昌教授以聖
人之道誨諸生中書叅政方鼎國子祭酒吳啓皆其門
人也久之去官楚昭王聘為子師先生益以道自任王

敬禮加焉永樂初召修高廟實錄號良史才書成改開
封教授以教武昌者教開封周定王亦敬禮之未幾卒
年六十六先生之學無不究雖方外之教亦能通其義
然持身端重從容矩度之中孝於親友於兄弟撫教孤
姪如子謹於義利無一毫苟得之意初罷武昌教授時
諸生致贐皆不受曰但勉修德業於勤有光足矣及在
楚府蜀湘二王嘗致書幣願一見廣西鄉試請典文衡
先生以王待已厚不欲更外交皆謝卻之湖廣叅政吳

雲故與先生相好雲卒於官二子貧不能歸先生維持
教誨俾有立平生喜揚人之善而掩人之過至於論事
則公其是非不肯俯仰以徇俗君子謂先生不特文學
可敬也初號匡山樵者晚更號由翁其文章渾厚典則
有集若干卷藏於家子一人善存

論曰孔子嘗言君子喻於義小人喻於利蓋君子義以
為質其行已及物曷嘗不以義哉小人之隳行敗名鮮
不由於利然觀昔之任事者往往以利為急而於職之

所宜則闕然此其故何歟先生謹於義利如此謂之古君子非邪今之任治教者皆擇謹於義利之君子而用之使皆得如先生其效之白於天下當何如盛哉故論著之使人有所興起云

陳叅政傳

公陳氏諱雷字士啓一字震之其先自金陵徙居泰和世以科第顯曾祖文瑞瑞金訓導祖存道安遠訓導父煥章公自幼喜學十歲攻文章十七為里塾師升堂講

授屹然如鉅人鄉之號為儒者多不及諸老先生皆器重之曰士啓他日遠到未可量也稍壯父坐誣謫遠左從者道亡公聞之即馳往省焉為營產業治經費備物致養父樂之忘其為謫也久之奉命歸養母益開戶讀書或勸之仕公曰孔子云不患無位患所以立吾方圖所以立者未暇用公意也永樂初詔設科取士公曰可矣遂以易經中高第選入翰林為庶吉士與修永樂大典以精博得名書成擢為祠祭郎中敬恭祀事於緇黃

少所假貸君子是之未三年陞山東叅政公喜曰天子用我矣宣化惠民吾職也故民有所不便及有所欲者皆奏言之事多見從及營北京公率山東役夫撫之如子民皆樂為之盡力及陶甕衛河亦然于時今刑部侍郎樊公董其事最為嚴急少許與獨愛敬公朝廷遣御史給事中理山東軍籍要公與偕行多所辨別民免於誣枉青州飢詔遣使者如所奏賑之而有司言續有飢者數加倍使者使必再請公曰此皆國家赤子飢死在

旦夕能待再請耶吾以身任其事使者不得已從之全活甚衆民知公之厚也皆愛戴如父母盖公仁恕出於天性而潔廉自持故所立如此宣德六年八月四日以疾終於位年六十六子一人曰祚初予與公同領鄉薦上春官凡八人公最長衆皆兄事之數叩以難事公立為剖決曲盡其道及觀指揮羣下難易緩急無不適其宜當是時固知公之善為政矣及自山東考績來京予謂之曰聞山東之人無貴賤愚良皆德公其善之可書者

多矣公蹴然曰吾備員叅政奉行天子德意而已何善之敢言且吾日夕勉之恐不及安事紀載為他日名乎予於是愧其言古之君子貴務實而恥為名蓋虛譽之隆實德之病也後之君子實則未善而急於取譽承以器子儉孫又好撫拾以自誣此流俗之通患也若公之所存豈不誠君子哉予知公舊矣不欲其無傳也乃記所聞者數事著以為傳善觀人者觀此亦可以得之矣

林母盧安人家傳

安人盧氏文昌人元稅務都監仁壽之女自幼貞警靜淑習嫻女工年二十歸林氏是為文昌縣令德隆之配林氏故莆田人其先世宦游愛文昌山水之勝遂居之世為奉化奕屯田千戶貴盛矣安人歸林氏其舅姑尚無恙安人於衣服飲食必親調視而奉祭祀供賓客接族婣皆適其宜舅姑嘗稱之六親曰新婦如此足昌吾家德隆尹鄉邑有遺愛及人人無非間之者安人之助也當元季世陳子湖倡亂海南迫逐元帥陳乾富德隆

以義兵赴之屯萬安軍而賊囚其家屬安人謀於姑曰賊勢如此蓋利吾家也盍輸財以緩禍乎從之乃得免林氏貲產素饒其鄧氏姑竊取銅鼓莊田五頃契券鬻之德隆父子訟於官乃得贖費鈔三千餘錠其後族屬欲脅而有之德隆弗與安人曰與之不然禍自此始且分田以厚宗族於義大矣卒與之而宗族以和德隆有庶子通安人撫之如己子人莫識其異母也其他賙給鄰里惠恤臧獲尤多蓋其細故也安人貌修長兩耳垂肩

其律身端恪勤慎宗族化之今年過九十有子四人長
曰廣為廬陵教諭次曰寬次曰密舉進士為刑部主事
先卒又次曰寰孫男女三十人曾孫男女九人歲時伏
臘奉觴上壽怡怡然皆中禮節鄉人榮之而安人教諸
子孫必曰修身謹行蓋善教也

泰和王直曰予先公治瓊州時嘗識廣于士林中知其
母之賢也亦嘗於直道之自古國家所以廢興皆由女
德之隆汙若盧氏之仁智如此其可多得哉其可多得

哉

葉秀實傳

葉氏崑山士族而秀實尤樂善急義雖泊然布素於義所當為與惡之當去毅然自任而不同蓋有古豪傑之遺風元之末世方國珍亂海上小人乘時相挺而起善良被禍崑山福巖寺僧有提點與其徒昌都寺等亦聚無賴殺人肆焚劫略財物子女敢拒者驅而錮之舟中焚于嚴沙溝以威脅其人有司不知所為賊勢漸張禍

及秀實秀實姻家金某刺知之賂以重貲乃得免秀實憤曰鼠輩敢爾今吾雖幸免忍視鄉人罹其毒不剪除之又一國珍也陰募勇敢士得徐辛一等若干人經畧已定乃以賊焚劫之跡繪為圖上之路率衆掩捕盡得之無脫者官為窮詰皆伏辜而有提點實先瘦死秀實聞之曰佛法重闡維戲作舉火文以著其惡鄉里稱快至今多能誦之者焚劫圖有副藏於家秀實孫茂以授孫春曰爾高祖備衆善此其一也而鄉里實賴之不可

以無傳春使其子兵科給事中盛請於予予觀自古禍亂之興必由小人竊發於下世無豪傑掃除之遂浸成亂階秀實之功偉矣豈非豪傑之士哉當其舉事時志在除惡激於義而已傳不傳非所計也而春父子汲汲以圖不朽記曰先祖有善而弗知不明也知而弗傳不仁也春父子可謂明而仁也已故論著之

彭母傳

彭母者泰和彭詡母也母劉氏諱靈萬安東溪處士本

直之女嫁為月池彭原復之妻生二男三女訓其長也
年廿六而寡居母幼涉書記能知古者女婦賢行誓死
不嫁勤女事以自給當是時宗族有困辱其孤欲撓屈
其節而利其所有者母自守益堅終不以是改行教訓
力攻儒術隨事訓切之不少懈嘗指其父所藏書告曰
此爾素業也能讀書為善吾志樂矣訓亦自感勵學遂
有成東溪處士既老病無子母慨然謂訓曰吾父惟吾
一女今兒幸有婦主饋祀吾歸養矣遂歸東溪養處士

衣食藥物必親自調治凡七八年處士卒終喪乃歸平
居端靜淑慎不妄言笑其處姻族恤鄰里馭臧獲各盡
其道年六十八而終鄉人之為女為婦為母者皆以彭
母為法云

史官王直曰予聞前元時東平李如忠為山陰令其妻
蒙古氏早死繼室馮氏有二子仕伏如忠卒于官李氏
及蒙古之族相率至山陰困辱馮氏取其資以去馮不
與校以節義自守廬如忠墓下二十年教二子讀書為

善卒奉如忠骨歸其鄉葬焉二子亦卒為名士李氏及
蒙古之族皆愧之至不敢見馮氏年七十餘而後卒當
是時吳文正公虞文靖公及諸名賢皆紀載其事至於
今馮氏猶生也而李氏及蒙古之族亦播其惡於遠鳴
呼可鑒矣今彭母之困於宗族不幸頗相類而其苦節
孝行則過之其善如此豈非詩人之所謂女士者歟予
文雖不及二公然不可使無傳也故論著於篇使傳焉

王處士小傳

王處士名守訓泰和南富里人也王氏自廬陵再遷泰和世積忠厚至處士直諒謹畏不妄言動居家善事其父母而友于兄弟洪武初覈民田仇人以不實誣其父官盡沒入之家素富而驟貧然所以事親奉祭待賓客不失其故者以處士為之子也兄守益早卒處士善承其家幹父之蠱雖劬力殫財未嘗望諸弟歲時伏臘備物以養親兄弟奉觴上壽必謹儀度其進退盖怡怡然父母沒葬祭無違禮其析貲產與諸弟多寡必均未嘗

私一錢諸弟妹未婚嫁者備禮婚嫁之人人得其所與
朋友交久而不怠平居簡靜如不能言者及臨是非曲
直之際其辯論堅確如黑白東西不可眩惑故鄉人有
不得其平者多取質焉子弟有過失輒毅然衆辱之必
愧悟請改乃已教其子經舉進士得太康縣學教諭處
士嘗就養之太康其與諸生言者必據於理諸生多化
服焉予居泰和城中去南富不二十里然未嘗相往還
而予友浙江僉憲郭公緒處士姻家也嘗再於郭君所

見之蓋恂恂然可謂一鄉之善士者矣夫人之所以為貴者以其循天理之正盡人倫之常也然而有不踐此者何哉欲勝而已矣故親老而不致其養親沒而不謹其終侮其弱兄欺其稚弟凌虐其幼孤者比比也是失其所以可貴者矣失其所以可貴者則惡得謂之人哉而乃騁其私智鼓其邪佞以自蓋其行而矜肆於一時其可乎故予以謂為人者惟無愧於天理人倫斯善矣豈須為詭異邪若處士者蓋不失其可貴而君子之所

尚者也故論著之使鄉人子弟有則焉

胡母段氏傳

段氏番易人世居碩輔里其父則榮甫也自少柔惠淑慎善女工事父母盡孝敬父母愛之既長嫁同邑胡以寧移其所以事父母者事舅姑舅姑又愛之姑先卒哀念不置有遺女生甫七月教育如其所生女及笄出資裝嫁之如姑未亡也舅為兩淮鹽運使與以寧相繼沒有後姑多病以寧二子秉彝秉恒皆幼家政母獨任之

仰事俯育奉祭祀待姻族皆中禮法後姑安焉而二子皆受教有成立寡居凡幾年終始一意未嘗少有玷缺今年已七十七矣予聞婦人主內事凡閨門之內所以事上撫下與凡所當為者皆婦道之常至於夫死不嫁而安於節義亦其常分所當盡此所謂民彝也天地之道亦貴於有常然則非常之事蓋可謂不幸矣牝雞之鳴有孤之歎此婦人之非常也君子奚取哉而世之妄子孫務撫奇以動俗嗚呼亦謬矣秉恒之母盡其常道

如此可以垂訓於後世為婦人者能此亦足矣奚以異為哉奚以異為哉

贊曰昔者君子之論有家也未嘗不致意於女德焉蓋女德者家之所由興替也然女德之脩豈有他道哉幽閒貞靜孝敬勤儉而已此其常也觀於關雎葛覃鵲巢采芣諸詩可見矣及鄘之柏舟則因其不幸而節義著焉此其變者也聖人皆取而列之經所以為法於萬世然則後之女婦有能處變而不失其常者固君子之所

取也作胡母段氏傳

周公明傳

先生周氏諱启字公明吳周瑜子都鄉侯允之裔其先
自廬陵之烏東徙今吉水之泥田世以宦學顯聞而先
生之祖學顏父孟泰皆不仕然皆以學行重鄉里先生
聰悟絕人經史百家靡不通為文章必據於理下筆千
數百言可立待皆偉麗不凡前輩大奇之天性至孝事
父母盡其道有疾必躬侍湯藥衣不解帶食不甘味及

卒葬祭無違禮先生幼時母多病祖母龍撫育之先生事之甚篤龍卒躬負土成墳修祀先塋惇序宗族皆不失舊規叔父仲芳久仕於外先生為訓其子慧榮皆使之有室其教子弟與鄉人之子弟必以孝弟忠信於義之所當為者為之恐不及自廬陵縣學訓導典教黃岡長洲三邑之士蒙指授者皆成名嘗考福建浙江廣東湖廣鄉試最為得士當時號良有司以永樂癸卯十二月四日卒於長洲之官舍年六十六初娶曾氏生子曰

道再娶藍氏生子曰迪今為翰林脩撰次曰選曰達曰進孫男七人長曰源為武陵教諭次曰沂浙相澄洪漢先生邃於春秋所著有春秋望洋策學舉要及詩文若干卷藏於家太宗皇帝時纂脩永樂大典徵天下名儒先生前後居館閣者凡六年其所撰述少有能及者嘗有詔試大一統賦獨先生最優當時皆謂先生宜在侍近備顧問而竟止於教官豈天固以先生師後進邪抑豈其命也邪

泰和王直曰周先生在館閣時常得從之游其持已正大而接物和易人無賢愚少長待之皆懽然有恩然至為非義則諄諫不少貸性嗜酒雖多不亂苟非其人不處也世之為士能和以接物者多俯仰隨俗而失之通其正以持已者又矯亢絕俗而失之隘先生可謂豫而介隨而不失其正之君子矣又況立其大者邪故論著之使傳焉

劉子淑傳

子淥劉氏名會吉水人也自少嚴重不凡銳於為學從胡時中受業講性命道德之奧最喜為詩清遠有思致其事親敬長皆循循有禮法先墓在南山子淥增修祠宇謹於祀事歲時未嘗廢父天性早卒子淥哀念不置每一語及輒涕淚滂然洪武中從弟子淇以縣丞奉命使山東得疾子淥往視醫不能起遂歸其喪葬焉撫諸姪底于成立而後已篤意教子遣鐔從胡敬方受春秋業成領鄉薦及會試得教官且戒勵尤篤嘗曰賢才為

治之本教官為成賢才之本可不慎乎其襟度夷曠超
然不累於物足跡未嘗至官府翰林學士解公胡公侍
講鄒公家居時皆相與為莫逆惟喜交游樂賓客晚與
黃叔昭諸公游每偕造南山祠下樂花木泉石之勝觴
詠終日誦淵明詩悠然見南山恍忽若神交焉衆因以
悠然為其號至老鬚髮郁然無一莖白者此非有所自
得而能然哉四子長曰鐔次鏞銓鏞皆能承其家年六
十九而卒

泰和王直曰劉氏之先仕南唐其居吉水巽湖者盖自金陵徙也子淑曾祖明翁為郡教授祖信卿與歐陽師尹通家相往來父天性號東山靜隱東閣大學士吳澄為之記至子淑益自立其所交又一時名儒皆有著述豈非所謂文獻足徵者歟孔子曰魯無君子者斯焉取斯然則子淑之所以能賢於人者有以哉

廖節婦傳

節婦廖氏泰和人松溪教諭廖季習先生之子嫁為刑

部主事楊君相之妻淑慎勤儉閑於女事閨門之內肅如也主事君篤志學問日夜不懈永樂甲申會試禮部第一遂取進士詔選入翰林為庶吉士學古為文辭而其志彌厲及為主事雖勤於職務而猶不廢書節婦綜理家政一不以煩君故君得如其志遂以文章名天下未幾卒於官節婦年纔廿二扶櫬歸葬每號慟輒欲絕隣里不忍聞子奕與皆在襁褓節婦保抱攜持未嘗去左右曰此吾夫所遺未亡人所恃以終者也主事君初

妻曾氏有女撫育之如所生謹於禮法不妄言笑足跡未嘗出外庭事舅姑極孝敬舅姑有疾即籲天以禱乞延其壽以長孤幼舅姑沒居喪皆盡禮待諸妯娌亦仁而有恩二子一女既長皆教之學業而使有室家曰吾可以見吾夫矣縣之人士皆嘉其行相與言於縣大夫而以聞于朝詔旌表其門景泰元年節婦年六十三守節踰四十年貞潔之操至老不渝易曰婦人貞吉從一而終蓋庶幾矣二子求予言以傳信後世予於主事君

友也常念其不幸早卒而嘉節婦之能賢故論著之亦以為世勸也

劉憲副傳

公名祿字子敏泰和劉岡里人也父壽叔早卒母蕭氏治家有法以嚴訓諸子公善承其意前監察御史王公罷官歸為縣學師見而愛之舉為弟子員業成入太學選為山東道監察御史時朝廷清明慎於刑獄任事者一不當即受其辜公斷獄百數無毫髮違理者由是知

名山東道無治遼東人有告遼之戍卒蕭茂德關入官府治文書前之犯此者皆死公獨察其誣曰茂德所治文書當有據不然人可妄殺乎力為辨之茂德得不死三十三年以言事忤權貴黜為福州侯官令侯官久不治官吏無解舍案牘版籍無所考公奏言之前之權貴滋不悅公所為又降為侯官典史公笑曰是豈不可為治乎令尹子文三黜不愠於我何有哉於是實戶口核賦稅鈎考簿書發摘欺隱豪民猾胥不敢揺手公堂吏

舍以次繕完然後申教條布忠信事有便不便者皆次第罷行凡上之所施下之所訟皆聽於公無不悅服縣以大治永樂初徵拜河南道監察御史尋陞山東按察副使上賜之錦衣綺帛楮幣乘傳之官蓋特恩也公嘗曰山東之民素淳朴宜待之以誠當自無訟沂州民以竊盜當殺者九人公曰以竊盜殺人出一時非定令盍緩之既而遇恩皆免死以內艱歸葬祭盡禮服除改湖廣副使鄉民有戴計元者客湖廣時禁以銀為市犯者

皆死計元被誣不能辨自引服公至訴之公為逮其舍主與嘗共為市者辨之乃以銀為酒器非市也訟者疑而誣焉卒得白以舊官復職調廣東其辨姦雪枉剋弊興利一如前既而考滿以疾告歸所居有溪山之勝田園池沼之娛而忠君愛國之心惓惓不忘也其處兄弟以和交朋友以信訓子弟以忠孝常積穀以濟貧乏不能償者不責也其有不平者皆求直於公得一言無不意滿而去其德誼之信於人如此娶蕭氏子公平公正

公濟

論曰予官京師二十年見子敏之故人多矣皆能道其
昔時事如此偉然可尚也閩之人士言其侯官之績尤
卓卓及其去皆歌詠之於戲何其澤之入人者深也士
君子讀書學道固將有為也官秩之崇卑何暇計哉觀
於子敏可知矣故論著於篇

南園翁傳

南園翁蕭氏字仲齡世家泰和縣城西翁兄弟少從陳

心吾蕭尚仁先生學欲有以自見於世其兄伯齡為金華教授以薦起為寧波同知卒弟李齡繼之翁獨養父母盡孝撫二室之孤如己子凡祭祀賓客公私百為翁皆任之由是無四方志延明師以教諸子訓厲之不少懈鄉閭之貧窘者多仰給於翁事有不平亦於翁講決焉子進取進士歷知兩縣有能名翁喜曰吾子能為縣吾可以自樂矣有田在雲亭鄉南園皆上腴作屋臨溪畝課童奴勤稼穡一鄉之人賴之歲時豐成各持所有

獻庭下翁亦烹肥擊鮮以勞農歌呼笑謔醉飽而後罷
蓋囂囂然樂也往年予以憂家居過雲亭鄉因訪翁南
園而翁適入城不及見為名所居曰南園別墅而歸明
日遇諸市翁大詫曰吾南園之樂惜君不得與也鄉之
人士遂稱為南園翁而歌詠之其後予起復來京師聞
翁在鄉邑間益以齒德而為縣大夫所尊每鄉飲即以
賓位處之予益歎翁之清高閒放其福不可及也去之
二十年翁年七十四而卒又十餘年予在吏部而翁之

孫彛為考功主事以學士陳公所作翁墓表來見求為之傳予既衰病將歸老于武山之陽思得如翁者數人相與婆婆嬉遊從容酣適於社神田祖之間以極太平之樂而不可得也故摭其事以為之傳云

夏友諒傳

友諒夏氏蘇之崑山人大父貴一父公達皆讀書有隱德友諒生而岐嶷七歲即喜學言論如老成人馬鞍山寺僧某戒行為吳人所敬見友諒愛之摩其頂曰他日

為吾弟子友諒拂然曰異端之學我不為拂其手去之
嘗隨父至郡城從者攜鋸市器物友諒曰置器不如置
書父異其言從之既歸即遣入崑山縣學受書於陳潛
夫潛夫深喜得之剖析奧義頹悟絕人時年十二下筆
為文章頃刻立就夏夜置燈帳中讀書不輟大父念其
過勤起視之促使就睡見几間有絕詩曰更殘燭短可
微吟周孔遺書似海深感慨聖賢無復見只存糟粕在
吾心明日語潛夫潛夫歎曰此子天分甚高蓋將咀其

英華以自足豈但味糟粕而已益以遠大期之而友諒志益篤然未底於成以卒卒時纔十又九君子皆痛惜焉娶鄭氏遺腹子一人善長母守節教育之既長刻苦自礪能以其學為人師生四子佑輔顯遂而卒年缺

佑以文學舉為臨海丞遷禮部鑄印大使遂舉進士為禮部主事兄弟過予道其父祖事而悲欲託予以不朽天之生人既賦以過人之才若將使之有為也然不底於成以卒此其意何哉豈非誠有命焉也予觀漢賈生

年十八以能誦詩屬書受知於吳公及薦之文帝召為
博士年才二十耳雖卒以齟齬窮亦不可謂不遇也友
諒負奇才自幼已知絕異端崇正學讀書晝夜不厭觀
其所作詩殆有志於上達者邪然前不遇吳公後不遇
文帝而賣志以卒卒而有子幸矣亦不遇而早世其命
如此若之何不悲然賈生之後嘉在武帝時任太守至
九卿豈天以其欲命生者命之邪語云用不極者有後
福生之謂乎友諒雖早死而不遇今二孫仕於朝駸駸

通顯矣殆將與賈氏等邪予為傳載其事友諒聞之其亦可以無憾哉

字說

張博克溫字說

會稽張友讓名其仲子曰博博之師金某字之曰克溫博從父來京師而請其說於予予謂男子之生父名之既冠賓字之為之辭以致其祝頌戒勉之意宜也予非賓也何可僭一辭哉而博之請益勤乃試為之說予聞

友讓名其三子取三才之義焉博者地之質也溫者其發生之氣也地之體誠博矣然非氣之溫亦何以能生物哉自冬至一陽來復蘊於地中未發也積之之久則其氣溫然達矣於是土膏發泉脉動而物莫不生焉故地之能生物者以其氣之溫也聖賢之道具於書欲其博而又貴於溫讀書誠博矣非時而溫之抑何以能求道哉自聖經賢傳以至諸史百家之言呻吟讀誦有未洽則溫之溫之熱其學充然進矣於是明體以達用而

道無不盡故讀書所以能盡道者以其學之能溫也使
溫習之功不息於博學之餘如元氣之溫無間於廣生
之際則豈有不成也哉博而字之曰克溫其亦顧諟而
思勉也乎夫寡者博之反也寒者溫之對也博學而篤
志溫故而知新是所望於子也寡聞而淺窺一暴而十
寒非所望於子矣勉哉博也毋負父師所以命名與字
之意也

邵志和宗禮字說

嘉定邵志和宗禮始為監察御史以憂去服除改贛州
推官其在贛也與予兄善學相交故來京師亦厚予間
告予曰吾幼而先人以志和名之既冠而師以宗禮字
焉惟吾父師所命不敢忘願先生釋其義庶終身誦之
予謂人性之禮即天道之亨具於心而見於君臣父子
夫婦長幼朋友之間動靜云為之際皆有自然之節秩
然之分不可以毫髮僭差其體至嚴也夫既嚴矣而加
以操切刻厲則將至於離而難合故其用貴於和和者

從容不迫之意蓋於至嚴之中而以舒徐行之使粲然有儀懽然有恩則禮斯盡矣然知貴於和不復節之以禮而或過焉則將流蕩忘返而禮終不可行矣名子曰志和者欲子以和為貴也字子曰宗禮者欲子以禮為主而不過於和也名字之意蓋如此夫世之善其名字者皆是也而能充其名字之實者未必皆是也宗禮佩父師之訓不敢忘是將充其名字之實視彼假借以稱道者有間矣君子之自修無已時不以老而倦也衛

武公年過九十猶勤於自修宗禮幸未老也孟子曰君子所以異於人者以仁存心以禮存心而朱子謂禮者仁之著也宗禮其尚謹於禮致嚴於三千三百之間修於身施於人推之家國天下從容以行之而不過其則焉則無愧於父師之所命而庶乎古之君子矣

梁相叔脩字說

予堦梁相初名橫字叔脩脩之為言長也蓋以梁木必橫著柱端以負棟承棟而堂構乃成然非長材不能勝

其任故以是命之也及入邑庠為弟子員其師以橫字與豪橫之橫同乃改名相仍以叔脩字之既而相以內艱家居思大父母父母之墓未有銘以昭其德慮自陷於不孝乃來北京請銘於諸公將歸以字說請於予曰願有教也予謂橫者梁之任而脩者其材欲子思其任之重而自勉以成其長才此爾父意也師以橫字為嫌而易曰相非以棟梁之任辟國家輔相之職也與相而仍字叔脩蓋脩又以飭治為義輔相之道必治身以為

本也且相非但輔國家凡居副貳之位以佐助其長皆是已先自治而後治人其道一也道莫大於堯舜而孟子謂堯舜之道孝弟而已孝弟者仁之始澤民育物皆自此而推也叔脩惓惓於親可謂能孝矣由是而敬其身使言行皆君子則足以成其親兄弟者親之一體而分也推孝親之心以敬愛兄弟則道立而身脩他日推之以及於民物而無所不宜輔相之道得矣予願子以孝弟為務也世之人孰不本於親然能篤念不忘而思著

其德於永遠又推以厚於兄弟而不忍侵害之者甚少也棄之如芻狗不知其善之可傳侵害之如寇讎不自知其惡之可恥此禽獸異類之所為何益於家國也哉其能存也幸矣勉哉叔脩必敏於自治以求稱夫命名與字之意無曰輔相之任非小子所敢望也

守性說

毘陵胡克寧今大宗伯之軒公之弟也以守性自號公俾予致一言夫性者人所受於天之理也其目有五曰

仁義禮知信施於人倫事理而各有當行之道斯理也
與心俱生心存則理存是故父子君臣夫婦長幼朋友
而各盡其道之常至於應事接物作止語默好惡取舍
應對周旋之間亦無不當於理者此聖人之盡其性也
若衆人之生局於氣稟蔽於物欲由是性不能全歲改
月化則氣日昏欲日盛而所謂性蕩然無復存者於是
遺親後君瀆夫婦紊尊卑失信於朋友言非其所當言
為非其所當為好惡謬而舉措乖凡其所存所由者皆

出於私欲不復計理之如何然求夫害性之源莫切於
貨色莫甚於酒尤莫急於氣性之所以漸漬淪溺而蕩
然無復存者未有不由於此夫既蕩然無復存者矣則
亦何所不至哉惟好學君子知欲之不可縱性之不可
失加存養之功致執守之力於夫人倫之大日用事物
之細必欲踐其道之當然而不肯少悖焉者此所以為
賢也克寧有公為之兄其才可以有為而循循雅飭謹
於自脩言之發惟懼弗當於理惴惴焉不敢少自放

蓋知欲不可縱性不可失以古之君子為法而以衆人之顛倒迷謬者為戒雖其生質之美而公之教於家者可知矣昔者子思作中庸首言性以見道之本言道之不可離必戒謹於所不覩恐懼於所不聞宋之大儒則以敬為學之要戒謹恐懼是即所謂敬也持敬之功無間則人欲消不離於道不失其性而何愧於古君子哉予嘉克寧之志而欲勉其進作守性說貽之且求教於公以為何如也

說旅卦示穆

予子穆來侍既一年而其兄穰秬皆當來北京獨穰留
治家事因命穆歸為穰助方治任適有感於予中而歎
旅行之難也乃本易卦作旅說以戒之旅之為卦內艮
止而外離明止則安於義禮之正明則察於事物之微
安於正而不為內欲所遷察於物而不為外物所陷是
以能亨且吉也旅之道貴柔而忌剛然初六以柔而居
下卑污猥瑣而災咎及之此柔過之弊也九三居艮之

上上九處離之上皆過剛而自高羈旅而過剛自高則誰能與之故至焚灼而喪敗此剛過之弊也九四用柔而能下六五柔順而得中皆善矣然處不當位故四雖得資斧而不快於心五雖有譽命而不免亡失皆未盡其善盡旅之善者其惟六二乎六二柔順而中正柔順則不失於剛強而人無不從中正則不徇於偏私而事無不當故能安其居保其財童僕亦貞信以事之此旅最吉者也穆其可不知所務哉勿違乎天理而暗於事

幾過柔取辱過剛取禍與處非其正皆不可柔順中正
以避凶趨吉此予所望於穆也然柔順而不中正則柔
順將失之過而萎靡不立亦不可也必全盡是道斯善
矣穆也其尚留意於此哉夫出門庭去閭巷以達於鄉
黨州閭皆為旅不必適千萬里之遠而後然也究而論
之人之有生亦寄寓而已蓋無往而非旅則無往而不
用是道能盡其道則無往而不獲吉奚可有遠近始終
之異哉穆服膺予言而終善且吉焉則予之志得矣

王稌希薦字說

稌稻也用以飯者其性宜下濕雖處處有之而江南為最宜族叔伯昭翁名其長孫曰稌而稌之同輩命字皆以希為號希望也有冀幸之意焉鄉人因以希稌字之古之立名字者皆有義非苟焉而已孔門弟子冉耕字伯牛耕者牛之事也仲由字子路路人之所必由者也近世大儒考亭朱子名熹而字仲晦晦者不欲眩其明也許文正公名衡而字仲平衡所以取平也其義如此

徐而字曰希徐何居去年希徐以事來北京不以其字
為是請予更焉予讀豐年詩多黍多稌則為酒醴以烝
祖妣洽百禮而神降之福因字之曰希薦薦進也蓋徐
之豐必以薦於親薦於神明然後能致福於其躬若徒
積之使陳腐焉而享祀之禮廢則必有怨且恫者福惡
乎來哉此予所以命字之意也嗟夫希薦爾知所以薦
之道乎事親主於孝而事神貴於有德孔子曰孝弟
之至通於神明則孝弟者享祀之本也勉於其道則禮

洽而福至矣且孝者仁之實弟者義之實也希薦勤於
學求其所當為者而日勉焉充而至於仁義不可勝用
大人之事備矣豈特足以享祀而已哉予王氏之先既
盛矣今之子孫大不足以繼前人予凜焉以衰微為懼
因希薦之質美且有志於學庶乎其可望也故於其歸
作字說以勉之

文

示拒子文

予來北京十五年仲子柅來侍亦三年今將歸自念已及六十而衰病相尋若七八十者其能久生與否不可必也有所欲言其尚可忍邪故為爾柅言之始予四歲已失恃年才八歲則父以事去所倚賴者祖母耳當時非無內外親其教育我使不失詩書故業則舅氏歐陽先生之德予不敢忘也今幸居官食祿然才薄能鮮無以報上恩恒懼福過災生貽辱父母且累爾兄弟故謹守禮法不敢放肆爾兄弟亦當勉於為善庶相資以久凡

人之所以異於禽獸者以其有人倫也君臣父子夫婦
長幼朋友當各盡其道而每加厚焉然夫婦乃人倫之首
其尤厚可知若事官府而恭謹處族姻而敬愛待鄉黨
而和睦皆人道之宜爾能盡其道則無愧於為人而欲
盡其道則當以讀書為本也兄弟者同氣至親如手如
足華鄂之詩反覆乎天理人情之極爾輩蓋嘗誦之而
世之人多以妻子之私財利之末失兄弟之義忘恭愛
之心遂至相視如塗人爾兄弟當師古聖賢勿以流俗

小人自待也予少甚貧備嘗艱苦以今視昔所勝多矣
恒產雖不可無然須得之以義毋虛價毋抑求毋妄取
則人不怨吾亦可以長守而其所最急者在親君子遠
小人蓋親君子則能進於善遠小人則不流於惡以勤
儉治生以忠厚養德守祖宗墳墓食田園薄利勿怠惰
以廢業勿酣酗以生禍文章書法以秦漢魏晉唐人為
師學行有成能自立於士大夫之間鄉黨以善人目之
斯足以無忝於前人予若即死無憾矣爾歸與爾兄弟

觀之而共勉焉而又以教爾子若以予言為迂而棄之則爾兄弟之孝道虧矣其勉之哉慎之哉

哀辭

少保黃公哀辭

正統五年正月少保戶部尚書東萊黃公終於位年七十八事聞上惻然遣官賜祭命有司治葬事公始自卑官累陞至極品歷事五朝寵眷如一其德業顯於天下而又以高壽終可以無憾矣而士大夫尤哀惜之不置

蓋公端厚坦亮君子也忠於事上篤於愛民范文正所謂先憂後樂者公其人矣平生所為蓋無愧於天而為上為德為下為民之心至老猶不懈聖天子委之以南京其所託重矣然大臣如公者無幾人使得在侍近入則獻嘉猷於君出而宣聖澤於民以畢其所志豈不尤愈乎此士大夫所以哀公也衛武公之入相年九十五矣而進德不倦公之年尚足以有為乃遽止於斯於乎其不可哀也夫古之君子有益於國家者必欲其久生

於世南山有臺之詩是已則於公之終雖欲弗哀可得
邪直嘗忝同僚辱交好尤不能已於哀者作哀辭

偉夫子之好修兮服仁義以自臧心怲怲其諒直兮行
弗戾於周行遭聖明而奮興兮庸一言以悟主始低徊
於下位兮遂卿佐其焉處勤朝夕以修職兮曰庶幾乎
蓋臣進專專以奉君兮退懇懇於惠民彼蠻蜚之凶悖
兮曾何識乎上下遇夫子而愛敬兮若赤子於父母荷
列聖之隆寵兮取精誠其未衰獻忠謀之亶亶兮冀永

世其賴之繫根本之攸託兮有嘉靖之丕績何天之不
憖遺兮奄一去而不可得惟夫子之洵美兮願在列其
幾人嗟弼亮與宏化兮胡緬邈其未申昔衛武之佐周
兮踰九十猶未怠茲黃髮之是詢兮悲夫子之不能待
周詩之詠臺萊兮祝遐壽於無疆夫豈私於君子兮延
邦國之休光嘒音容之日遠兮徒興念於疇昔寫予情
於斯文兮涕浪浪而沾臆

蕭先生哀辭

蕭先生名用道字坦行以名著當世居泰和之栗園里
蓋齊西昌侯叔誅之後世以儒名家先生父尚仁遽於
經術為鄉邑之望先生得其傳尤剛毅自守不苟合篤
於事親無用世之意親沒郡守朱仲智婺源令鄒以信
皆以經明行修薦之徵拜靖江王府直史又改諮議未
幾陞長史以選入館閣校理高廟實錄既畢蒙厚賜從
王之國先生以輔導為職每因言納忠欲王惇德謹度
以保國裕後又上章言八事而惓惓於敬身勤學嚴祀

事恤下人凡諸細務知無不言又因王府門作體仁遵義端禮廣智四箴以獻王皆納焉久之得風疾手皆顫掉請闕乞歸治吏部以擅去職為言左遷鷄兒嶺巡檢卒於官先生之學博而明其文雅而瞻其心明白正大動以古人為師故其所立如此視漢之江都相可以無愧矣泰和文獻之地也數十年前儒先君子凋謝已盡獨先生父子巋然為學者師死生契闊於是遂無所受業及先生以病告歸予時濫官翰林私竊自喜以為先

生雖不終輔相之業而鄉人子弟得有所依歸進學以
為世用其幸亦大矣而終不遂則又有兩失之歎孰知
先生之一往不復哉嗚呼可哀也已今三十年先生之
子吏部主事暄以先生所自作墓誌示予予不能已於
言也作哀辭

繫先生兮超等夷偉學行兮卓然奇懷仁義兮敦書詩
鏘琳琅兮放厥辭篤事親兮愛敬施上山巔兮下水涯
摘芳杜兮采華芝蹇徘徊兮憺遨嬉隨薦剡兮上京圻

服王官兮慎自持校史冊兮扶隱微闢彤彤兮廣之西
曳長裾兮儼逶迤相古人兮以為期謹獻替兮納箴規
言之發兮罔不宜嗟何為兮疾以罹懇欲歸兮乃去之
瞻風埃兮氣慘悽悵獨往兮歸何時國之悼兮失倚毗
鄉之歎兮無所師遣巫陽兮屑瓊璫號日月兮攀虹蜺
招不來兮我心悲歲年逝兮不可羈功業在兮名不隳
矢予詞兮當永垂

陳智仲哀辭

嗟夫子兮邦之良其貌既偉兮其氣則昌仁義以為服
兮忠信以為纓廉且厚兮直而剛才足有為兮志亦甚
揚遭世弗淑兮閫命是將乘一障兮為寇防撫善柔兮
戢暴強其職修舉兮厥績用彰馳吾車兮乃括其囊力
稼穡以自足兮樂泉石以徜徉孝於父母兮友於弟兄
睦姻族兮和一鄉燠寒以衣兮飯飢以糧貧女有歸兮
窮死有藏周急恤匱兮行之常匪用沽名兮孰計其償
奮餘力兮驅虎狼民利出入兮不病于行遭歲大旱兮

燭禍殃卒牲幣兮暴巫尫精誠獨格兮天鑒孔明沛澤
下澍兮反災為祥嗟夫子兮德愈光不究於用兮命之
弗臧梗楠之生兮為棟為梁中獨棄兮委山岡材之不
遇兮庸何傷豈天之意兮豈人之望偉令子兮鏘琳琅
遇明聖兮高騰翔金為門兮玉為堂朝並升而夕歸兮
穆忻忻而樂康食舊德兮襲餘芳夫子雖沒兮其存者
長水洋洋兮山蒼蒼夫吾辭以寓哀兮取千歲而不亡

余生哀辭

余生鶴年字應臯南康星子人翰林侍講余君正安之子也侍講君與予同取進士同官京師比屋而居且十年兩家相好不啻兄弟則予之哀生可知也生自幼莊重不類常兒稍長喜讀書善承其父教又使從黃重美先生習舉子業學為唐人詩日有進益事祖母高夫人與繼母陳宜人皆得其懽心宜人有子山年生愛之如同產飲食坐卧必偕人莫知其異母也及侍講君以高夫人憂去生隨侍歸南康予則扈從來北京及生隨父

起復而予亦以外艱去道路往來不相遇者五六年然聞生學益進行益修事父母益盡其道居京授徒能以師道自任人稱之予心益為喜以為侍講君世積忠厚宜有子如此也及予服闋來京師則知生哭弟山年悵悵成疾已死矣年才二十有七予與侍講君相弔哭甚哀其後每語及未嘗不哽咽流涕也嗚呼以生之才而承累世詩書之澤宜享有遐福而竟不永其年天之於生何如也豈所謂福善禍淫者非邪予痛悼生之不幸

又悲侍講君既老而孤故為辭以哀之亦因以慰夫存者耳詞曰

吁嗟余生才之良兮簪纓華胄煒煌煌兮讀書問學攻文章兮佩服荃蕙襲芬芳兮孝于其親謹溫涼兮進退周旋婉而莊兮撫愛稚弟善為兄兮開門授徒師道光兮我昔比居縣十霜兮朝夕見聞喜氣揚兮謂子世澤沛汪洋兮致茲才賢宜永昌兮嗚呼奈何壽弗長兮孰司予奪俾早喪兮福善禍淫天所降兮顛倒謬亂豈其

常兮騏驥奮迅蹶康莊兮駕馬踉蹌乃軒昂兮鳳凰于
飛于朝陽兮鍛羽霄漢臬則翔兮吁嗟余生心孔傷兮
視天骨骨莫致詳兮高堂有親老而康兮婉若嫠孤膺
福祥兮松柏鬱茂蘭芷芳兮彼蒼悠悠庶其償兮猗人
之生順則臧兮孰為壽考孰夭傷兮顏回盜跖亦俱亡
兮惟德惟善久彌彰兮吁嗟余生安其藏兮我心不忘
淚浪浪兮

湯君如川哀辭

余友湯君如川以明正之學英敏之才與予同登甲申
進士第入翰林為庶吉士而遭聖天子興文隆治之日
方將大其所學以文國家太平之休不幸以四十之年
未及一大用以卒卒又不克以棺斂歸葬故鄉而竟燬
于火焉嗚呼湯君其可哀也已語曰天道福善而禍淫
湯君孝友忠信循循雅飭其立身行己蓋有善而無惡
又承其先世積累之餘以至於此天之於湯君宜何如
報耶今既奪之年而又逢酷罰若此天道果可信乎哉

或者天其偶未定邪是未可知也憶予與湯君同領鄉薦上京師湯君每日引領南望以泣問之則曰始吾就試江西時吾親垂涕曰汝誠宜出身報國然盡節之日長我老矣汝未可遽去也今不幸而違其志使之忽忽不能自樂此吾之所以泣也嗟乎湯君之舉進士可以得祿以為榮不過相違期月之間而可以復見矣尚不忍相舍去如此孰知今遂死而不可復見也則夫湯君之孝慕其親與其親之慈愛於君者其心又當何如邪

豈不大可哀也哉予與君相知為最深方資君以為學
今已矣予既哀無以自輔又哀君之志不獲伸與其親
之思弗能已也故為辭一通以紓予哀以慰君之心而
泄其父母之思云辭曰

心曠恨而不懌兮慄鬱鬱而內傷哀夫人而不見兮魂
冉冉而外揚數茂行之信修兮又申之以多才判獨妖
而莫施兮孰有情而不悲思昔日之遭選兮揚厥美於
學宮余既升而肩迫兮誠槩獲之所同範先聖之遺則

兮率中道而不頗援道德以為美兮服仁義以為華衆
懽忻其既就兮遂超舉而進之忽同登以容與兮聽鹿
鳴之呦呦儵翱翔於春宮兮又乘風而捫天閭若其開
闕兮望帝居而上遷跪陳辭而敷衽兮中和暢而能祇
攄朝霞之炫耀兮攬星辰之陸離取皇鑒之昭明兮曰
學可進而不可止歷美質之尤粹兮履前哲之餘軌謂
班馬之不羣兮紛馳騁之先路尚專專以追逐兮罔儻
徊而窘步嗟予生之忉忉兮亦先後以逍遙亶惟蓀之

可恃兮獲棄穢而寡郵蓀既與予之不媮兮曰呻吟以
相羊謂年歲之不可留兮而渥洽之不可忘彼力穡之
不匱兮乃豐豐而有獲彼涉遠而自畫兮終蹇蹇而莫
達驟騏驥以沛徂兮策黃棘而疾施望前轍之超遠兮
誓奔屬以為期執轡羈而不替兮汨皇皇以追求刈芳
菲於蘭皋兮掇芳馨於椒丘吸沆瀣之泠泠兮飡瓊靡
之穰穰繚蕙纈之郁郁兮佩寶璐之琅琅信有美而莫
癢兮雖居蔽而日蒸固大人之所好兮豈流俗之所晟

願遙奔以極至兮，躬芳華以遠聞。昭先功而顯榮兮，報大德之無垠。曰皇天之降命兮，章白黑而不昧。善濶濶其綏社兮，惡昏昏而致殆。何斯言之不諒兮，荃信美以離災。夏烟液以為丘兮，又遇罰而增哀。心煩寃以絪結兮，氣沈苑而不信。涕潢洋而日隕兮，中侘傺而怵怵。計維蓀之秉志兮，豈維是而舍也。羌中路而顛越兮，何若是之遽也。親嬋媛而既邁兮，其何以為此度也。相大猷之漠漠兮，余何以為之輔也。渺余憂之芒芒兮，紉余情

之悒悒思荃美之汨約兮雖欲見而可載天既降之以
純美兮適奮勵乎嘉時溘厭按之泯泯兮又何善之可
為惟善而昌被兮余莫察其何故惟惡而康娛兮違衆
兆之所惡欲曾舉以叩天兮天高高而無階欲幽默以
隱閔兮又懣懣而不能曩伯夷之廡潔兮反貿貿以流
亡何陽虎之貪恠兮終衍溢而自強蹠何服於嫵節兮
竟壽考以淫遊淵何偈於規矩兮中邁凶而折之盖天
之未定兮故緯繆而顛隳苟端操而弗疚兮雖歆條其

何尤嗟古人之既然兮遺芳澤而彌章荃其援以為類
兮然何哀之可忘

陳德興哀辭

嗚呼予於陳德興之亡而歎賢令之難得也夫德興之
治其聲威非有烈烈動人也然而謂之難得者何也非
特行政而已矣有教焉課其農桑時其租賦均其徭役
審其獄訟政之施然也導之以詩書禮樂之習勉之以
孝弟忠信之行以成其人才以厚其風俗教之道然也

政以治其外教以治其內二者烏可偏廢哉然政有未備則得罪於有司猶之可也教之道不行則人將陷於邪僻而無以為善治之本教之不可以已如此也世之為令能舉其政者多矣其能興善教民行古之道者不多見焉蓋以是為迂緩而非有司之所急也至其甚者政且不能恤於教乎何有其又甚則疾禮法之士撓學校之政使不得教焉為令如此豈其職哉故吾於陳公之亡而歎以為難得也公之治德興首新學校與諸生

講學乎其中又率其耆老以勸邑人之子弟使皆興為善其為政寬平仁恕約已愛人去其所害而興其所利不急淺效近名行之三年而人歌頌之非所謂豈弟君子者歟公卒已三十年猶稱道之不置豈但其政之良有以致之誠可以見善教之得民心也彼聲威烈烈以取譽於一時者吾不知其得乎人能如公否耶使公久於職而迄其教之成又推而極於遠大不亦美乎嗚呼公遂亡矣非其人之不幸乎初公居四明山中閉門講

學不求仕進郡縣再三迫起之既出而所為如此則其
學問之懿操履之篤可知矣予是以知夫自重難合之
士之必能有為也公之仲子敬宗以公墓誌示予予慕
公之賢而哀其不及高壽以卒不得大施其所蘊且又
歎為令之能如公者少也故為詞以哀之公字孟藻寧
波慈溪人以考績赴吏部最其課將復職而病卒卒時
年五十一詞曰

學宮之隳兮公則治之教之弗純兮公則勵之政之良

金少卿先生集卷三十四
今俗以熙胡不眉壽兮弗究其施公不來兮民心悲廬
山高兮湖水瀾瀾嗚呼哀哉兮百世之思

曾用楫哀辭

用楫諱濟姓曾氏世為泰和北門人祖克仁有隱德鄉
稱長者父子省謹厚好學以推擇為邑庠生不試而卒
用楫姿貌魁碩而穎悟過人嘗受業於尚仁蕭先生先
生學徒數十人獨稱用楫先生死用楫無所於歸則與
其舅羅君仲深其友陳君孟京及予共學於其旁空舍

中四人者自相師用楫母在堂喜用楫能力於學使僮奴給茗飲燈燭之類晝夜不厭用楫通書經及羣書秦漢以下諸史皆暗記而能舉其事之詳下筆為文輒衮衮數百言方是時用楫年少氣銳其意蓋欲幾於昔人而止也嘗從予求司馬史記及昌黎韓子之文讀之曰吾有志於是矣其後予三人相繼入縣庠用楫慨然歎曰吾聞司馬子長周遊半天下故其文有奇氣後世無及者吾安能止於此乎即告其親度庾嶺涉蒼梧下湏

陽之龍以至於南海上覽山川之奇訪古聖賢遺跡以自壯不幸遇病客死於廣州年二十六時洪武三十五年秋月缺日也予三人聞之哀用楫賣志以沒相與

哭之慟用楫事親孝奉諸父有禮撫二弟有恩於朋友也義而信與人言必依於道理又承其先世忠厚之澤而卒不獲底于成求其所以致此者而不可得則付之無可奈何曰命也後予三人又相繼竊第入翰林每論舊故未嘗不哀用楫也既而二人又卒獨予在焉則予

哀又甚矣去年予以事還故鄉過其家用楫之母且老矣其子則既冠而有室矣計其舊遊則於今七閏矣而鄉閭之幼者壯壯者老其意氣之合蓋鮮有如吾用楫也則予何能自己於哀耶用楫弟用礪與予善悼其兄不置復告予曰哀哉吾母之念吾兄也又因子有感矣子何以塞其哀乎故為之詞曰

吁嗟用楫兮曷為而死耶生于令門兮其慶則遐質既美兮敏以和親戚是宜兮朋友是嘉稽經考史兮含英

咀華志則甚遠兮壽胡不多渺芒兮南海涯去鄉遠
邈兮歲月云賒母壽而安兮子有室家魂其歸來兮靡
適乎他魂不來兮涕滂沱嗚呼哀哉兮其將奈何

裴侍郎哀辭

公裴氏諱璉字汝器監利人初游學郡庠年甚少已巍
然如巨人長者久之升太學擢知劍州三年陞浙江按
察僉事改江西坐累謫興州太宗在位召為北京道監
察御史陞河南按察副使又以累謫武清復被薦為廣

東道御史仁宗在東宮雅知之擢春坊中允改大理評事又改刑部主事坐事降易州同知洪熙初圖任舊臣陞工部侍郎改北京行部又坐事去知涪州子綸為翰林編修得推恩及其親公遂棄知州就封以翰林編修文林郎致仕宣德十年三月十三日以疾卒於家年七十二公天資俊爽負奇氣眉目明秀議論英發率嘗傾一座其才敏過人當義而行無顧忌初在劍州州產茶民衣食之而為有勢者所擾公奏請禁止至今民賴其

利為無事在江西鉏惡佑善所至吏畏而民愛之其於
賢者維持成就如所親及為御史彈劾不避權勢河南
阜軍山寇發公奉命往察之還上討捕方略寇遂平階
州賊王金剛努等僭名號聚衆八千餘人勢悍甚又命
公往公得其巢穴以計擒之而請釋其餘上初遣公謂
還當大用而用事者嫉公絀其謀間疎之不召見而罷
其為侍郎尤侃侃自信敬恭朝夕有大臣之體在劍易
時興學養士至親為講說賞勤而勸惰諸生多賴以成

流風餘澤今尚有存者蓋公之志賈然出儕輩故所至
有立予之知者如此予所未知者計亦偉特猶是也平
生清約自持不苟取妄求仕四十餘年如一日雖累遭
譴謫皆非以私過得之故每斥輒復晚節優游以榮名
終享有盛福此好德之驗也予為諸生時已獲瞻風采
其後同朝又克深知公嗚呼今不復見矣則安能已於
情哉作哀辭

繫公之生兮秀所鍾儼玉立兮偉儀容才既美兮學則

通氣浩然兮縮以充懷奇寶兮慶遭逢有民社兮奮厥
庸興惠利兮蘇困窮建學校兮師文翁持憲紀兮揚清
風矯一鶚兮橫太空植善柔兮除姦克履巉巖兮窺崆
嶺殄寇難兮銷兵戎陪鶴駕兮熙事功搖玉珮兮鏘玲
瓏副六卿兮位愈隆勤夙夜兮甚嚴恭涖之治兮安蠶
農嬉白叟兮歌黃童詞林清秩兮恩所封煥勅命兮廻
鸞龍優游以老兮當時雍頌詩作兮聲淪淪奄一去兮
白雲中混希夷兮超鴻濛望不及兮心冲冲惟疇昔兮

抗高蹤事聖主兮暨三宗柔清德兮將無同善其始兮
慎其終宜壽考兮齊喬松胡不憖遺兮天夢夢彼控獨
兮愚且蒙乃悠久兮昌而丰欲往問兮安所從蹇徘徊
兮發哀悵思公不見兮奈何乎公

陳德遜哀辭

德遜予友也其家泰和縣東與予家相距僅三里予昔
家居時數過德遜德遜有靜室置書其中日端坐展玩
客來亦相與坐其中談論甚樂也於一切世利略不經

意義所當得者人或見負亦不問有弟德遵自幼教育之及德遵顯於朝苟憑藉以逞足以遂志德遜意亦澹然出入閭巷中如平時人皆敬禮之德遵在位久不得顧其私為之經理產業治居第忘其身之老也德遵嘗病走六七千里至北京視之既愈然後歸其篤於友愛如此方歸時謂予言有地在舊城上俯江山之勝當結茅為亭以待子共樂於此孰知歸不二年而德遜卒矣年才六十嗚呼惜哉予嘗自念鄉邑故舊多凋謝而予

亦老且病矣一旦幸得賜歸可與燕遊者惟德遜今德
遜又往則予之歸將誰與處而樂邪為之低徊傷歎
者累日乃作辭以哀之

太邱之胤兮西昌之良其行既馴兮其心則臧詩書以
為悅兮孝友以為常善靜修兮方自強縣之東兮百貨
場驟車馬兮隘康莊此恬澹兮彼動勸子之樂兮孰可
與方有弟顯兮名孔彰被天澤兮承寵光在他人兮藉
以狂子獨安處兮聊消搖以相羊篤友愛兮老不忘於

家汲汲兮於疾皇皇昔與子兮相頡頏久不見兮限兩
鄉忽見子兮來北京意甚適兮德不爽子遽歸兮分鴈
行云有地兮俯大江千山環合兮蛟龍翔將誅茅兮結
為堂待我歸兮同一觴嗚呼子去兮何云亡有志不遂
兮攪我腸天杳杳兮地茫茫炙鷄絮酒兮空相望予哀
子兮成此章壽雖不永兮其存者長子之逝兮庸何傷

錢處士誄辭

松江處士錢公汝明以正統辛酉七月六日卒于家年

七十予與其子溥有斯文之契由是知公之善惜不得
久生於世乃述其行作誄辭

錢氏之先實居于杭武肅奮興八州自王既歸有宋世
戴宦譜偉茲將仕維公高祖在元之初金玉其躬徙淞
南梁遂以隱終曾祖繼之延于大父暨公之考三世不
遇公始七歲失怙而孤疑如成人哀戚有餘恭愛其兄
兄亦愛弟輸賦後期爭就逮繫篤義之志至老不渝晉
覽魏津異世同符哭母而哀既封既樹悠悠孝心曷已

其慕豐姿雅度勇於振施周匱恤窮不計其資才達識
明遇事能斷扶幽發蒙霧卷氷渙守禮畏法不罹于辜
待物之誠遠邇俱孚非橫侵加忍而不校乘人之危亦
匪其好有子克賢翰飛刺天維忠與孝公訓實然公德
之茂宜介眉壽松城之東其樂靡究昊天則異而不慙
遺松摧柏姜君子之悲我昔聞公嗟未及見今其已矣
觴豆莫薦述此誄辭用顯其光後百千年庶幾不亡

抑菴文後集卷三十四